

Universiti tempatan mampu lahir modal insan intelektual

DE 13.12.2011 7

KOTA KINABALU: Mahasiswa di negara ini harus bersyukur kerana Malaysia mempunyai 20 buah universiti awam tempatan yang mampu melahirkan modal insan intelektual serta cemerlang yang menjadi penanda aras kepada hala tuju negara.

Exco Penerangan Sabah merangkap Ahli parlimen P178 Sipitang Datuk Sapawi Ahmad berkata demikian semasa menutup Program Siswa Gemilang Muda 1Malaysia 2011 Peringkat Sabah di Kolej kediaman Indah Permai Universiti Malaysia Sabah (UMS), Ahad lepas.

Katanya, mahasiswa perlu ada sikap well inform (serba tahu), daya saing yang kuat dalam semua bidang dan kreatif serta inovatif sentiasa mencipta peluang dan ruang setelah keluar daripada universiti nanti untuk menjadi intelektual.

“Saya yakin graduan yang dilahirkan oleh universiti tempatan memiliki harga diri serta akhlak yang hebat, semangat patriotisme kepada negara, agama dan bangsa ditambah lagi dengan ilmu pengetahuan intelektual yang tinggi.

“Melalui program seperti ini dapat

mengumpulkan serta menyatukan mahasiswa dan mahasiswa selaras dengan konsep 1Malaysia yang mana perpaduan menjadi asas utama di dalam menuju dan mencapai Wawasan 2020,” tambah beliau.

Beliau berharap program itu akan membuka minda mahasiswa dan mahasiswi serta menyerap perasaan tanggungjawab sosial di kalangan mereka.

Program dua hari anjuran Jabatan Penerangan Sabah dan UMS itu, yang memberi pendedahan kepada peserta melalui ceramah kenegaraan, bertujuan menyemai dan meningkatkan semangat jati diri dan patriotik di kalangan mahasiswa serta memantapkan lagi kefahaman tentang dasar kerajaan untuk mencapai wawasan negara.

Turut hadir, Ketua Penolong Pengarah Jabatan Penerangan Sabah selaku wakil kepada Pengarah Penerangan Sabah Raymie Amiril, Pengetua Kolej Kediaman UMS Indah Permai Prof. Madya Dr. Piakong Mohamad Tuah, Wakil Pengarah SKMM Sabah Aaron Tan, Presiden Perwakilan Pelajar UMS, Khalil Sabu.



SAPAWI (tengah) menyampaikan sijil penghargaan kepada Prof. Madya Piakong (kiri) sambil di perhatikan oleh Raymie (kanan).